

本草綱目拾遺

本草綱目拾遺草部上目錄

參條

參鬚

參葉

人參子

珠參

太子參

羅浮參

西洋參

東洋參

昭參

菊花參

紅毛參

煤參

建參

法落梅

土人參

上黨參

防黨

南沙參

於术

北雲术

南連

仙姑連
天姥連

水黃連

馬尾連

浙烏頭

即僧
鞋菊

霍石斛

五色
石斛

銀柴胡

撫芎

土黎蘆

金鐘
薄荷

綠升麻

白毛夏枯草

山牛膝

土連翹

巴山號

土茜草

野苧麻

雞鴨腳艾

千里光

小青草

澤半支

狐尾草

金錢草

望江青

無骨苧

麻

接骨草

麻衣接

鳳眼草

花上
細粉

風膏藥

竹葉
細辛

離情草

和合草

鹽蓬

麒麟蓬

知風草

鳳頭蓮

梨鬆果

蒲包草

鬼扇草

鮎魚鬚

紫背希奇

雀麥

本草綱目拾遺卷三

錢唐趙學敏恕軒氏輯

草部上

參條

從新云遼參之橫生蘆頭上者其力甚薄止可用以調理常病生津止渴其性橫行手臂凡指臂無力者服之甚效○千金方云凡煮參湯須用流水煎之佳若用止水則不驗

參鬚

百草鏡參鬚甯古塔來者色黃粗壯船廠貨次之

鳳凰城貨色帶白爲劣煎之亦無厚味 從新云
參鬚亦遼參之橫生蘆頭上而甚細者性與參條
相同而力尤薄本經逢原云參鬚價廉貧乏者往
往用之其治胃虛嘔逆欬咳失血等症亦能獲效
以其性專下行也若治久痢滑精崩中下血等症
每至增劇以其味苦降泄也

腳痔濕爛 百草鏡云芽茶參鬚各等分爲末繆
之

固牙補腎方 祝氏效方生熟石膏各五錢甘松
山奈各三錢細辛二錢寒水石二錢升麻一錢五

分青鹽參鬚各三錢北五味五十粒薑澄茄四十
五粒共爲末每晨擦牙嗽口嚥下亦可

參葉

遼參之葉也率多參客帶來以其氣味清香而微
甘善於生津又不耗氣故販參者乾之帶以餉遺
代茶葉入湯用不計入藥用也人亦無用之者近
因遼參日貴醫輒以之代參凡症需參而無力用
者輒市葉以代故今大行於時蘇州參行市參葉
且價至三五換不等以色不黃翠綠翠如生手接
之有清甜香氣者真

氣清香味苦微甘其性補中帶表大能生胃津祛暑氣降虛火利四肢頭目浸汁沐髮能令光黑而不落醉後食之解醒第一

按人參三極五葉乃稟三才五行之精氣寄形於草質爲百草之王其根乾之色黃得坤土正色其子秋時紅如血是土之餘生火也故能峻補元氣返人魂魄其功尤能健脾蓋脾主中宮爲萬物之母人無土不生參得土德之精以生人非若芭术之膩滯世所以重之然百草本性大率補者多在根葉則枝節之餘氣不可以言補也參葉雖稟參

之餘氣究其力止能行皮毛四肢性帶表散與參
力遠甚惟可施於生津潤燥益肺和肝之用今一
概用作培補元氣起廢救危何不察之甚耶

清肺生津止渴

藥性考

人參子

人參子如腰子式生青熟紅近日販參客從遼東
帶來者皆青綠色如小黃豆大參葉上甚多甯古
塔一帶七八月霜大難以入山故不能待其子熟
生取而歸以售客每多綠色發痘行漿凡痘不能
起發分標行漿者藥內加參子後日無癢塌之患

珠參

金沙江志產東川者味似參較苦○本草從新云出閩中以大而明透者佳須多去皮滾水泡過然後可用因其苦劣之味皆在外邊近中心則苦減而稍甘○書影叢說雲南姚安府亦產人參其形匾而圓謂之珠兒參○藥性考珠兒參根與薺苞性同

苦寒微甘味厚體重○救生苦海云補肺降火下氣肺熱有火者宜之臘寒者服之卽作腹痛鬱火服之火不透發反生寒熱血症用之可代三七○

藥性考性辛溫味甘能托裏外症堪用

按珠參本非參類前未聞有此近年始行然南中用之絕少或云來自粵西是三七子又云草根大約以參名其性必補醫每患其苦寒友人朱秋亭客山左間貨珠參者有製法服之可代遼參每五錢索價五十金秋亭罄千金市其方秘不輕授予懇其弟退谷始得其術因錄之以濟貧珠參切片每五錢以附子三分研末拌勻將雞蛋一個去黃白每殼納參片五錢封口用雞哺待小雞出時取出將筆畫一圈於蛋上作記如此七次共成七圈

其藥卽成矣每遇垂危大症并產蓐無力吃參者
煎服五錢力勝人參並能起死回生較臘狐心功
力尤捷不得少服約人以五錢爲率每次須多做
數兩救人

濟陰保元湯 醫鈴此方理脾化邪生氣引氣生
血爲調經聖藥滇珠參三錢以米仁四錢拌水蒸
透咀片再入薑加米仁汁蒸曬乾用懷生地一兩
砂仁酒薑三味拌蒸九曬收再以瓦焙爲炭當歸
四錢白芍三錢酒炒川芎二錢去淨油米泔水浸
洗收乾再入酒浸丹參四錢酒洗透充蔚子四錢

酒蒸透香附三錢以薑土醋鹽童便甘草水乳汁
逐次製過用雲白术五錢陳土炒女貞子三錢以
白芥車前水浸乾用如氣血加丹皮生地氣血
寒加肉桂數分不真確之寒熱而先後至者照本
方如經閉無分婦女本方加牛膝

太子參

從新云雖甚細小卻緊而堅實力不下大參

百草鏡云太子參卽遼參之小者非別種也乃蘇
州參行從參包中揀出短小者名此以售客

味甘苦功同遼參

羅浮參

羅浮山志羅浮所產人參殊與本草人參不類狀如山茅葉細莖圓有紫花三葉一花者爲仙茅一葉一花者爲人參根如人字色如珂玉煮汁食之味與參無別但微有膠漿耳

味甘帶苦生津養胃補虛羸潤肺

西洋參

藥性考洋參似遼參之白皮泡丁味類人參惟性寒宜糯米飯上蒸用甘苦補陰退熱薑製益元扶正氣○從新云出大西洋佛蘭西形似遼東糙米

參煎之不香其氣甚薄若對半擘開者名片參不
佳反藜蘆入藥選皮細潔切開中心不黑緊實而
大者良近日有嫌其性寒飯鍋上蒸數十次而用
者或用桂圓肉拌蒸而用者忌鐵刀火炒
苦寒微甘味厚氣薄補肺降火生津液除煩倦虛
而有火者相宜

、腸紅 類聚要方用西洋參蒸桂圓服之神效

東洋參

汪玉于言東洋參出日本東倭地其參外皮糙中
油熟蒸之亦清香與遼參味同微帶羊羶氣入口

後微辣爲各別耳然性溫平與西洋佛蘭參性寒平者又別此參近日頗行無力之家以之代遼參用亦有效每枝皆重一錢許亦有二三錢者總以枝根有印日本二字名價八換無字價五換蓋有印字者乃彼土之官參最道地無印者皆彼土之私參也亦有通身皮糙內肉白色者不佳桂圓肉拌蒸曬用○癸丑三月子在李燦堂先生處見有東洋參二種一種大者粗如拇指鑑似西洋參最堅實多肉一種小者每枝不過二三分亦有分許者肉薄不甚堅實據言二種皆日本洋客帶來新

時俱色白皮皆有綢紋其大者切片口含過夜皆化而無滓小者含口中三夜皆不化大者煎湯色淡少味小者反濃厚二種俱出日本倭地而小者何以色味獨厚豈生產之土又不同耶又一種亦出東洋近奉天旅順等處者皮上有紅紋云彼倭國中亦珍之言其力更十倍於此舶商多以貴價售得轉販中土今蘇州有東洋參店專市此參者蓋因上年壬子冬江浙疫痘遍染小兒死者不下千百計有教服東洋參能助漿解毒服之果驗遂大行於時入藥內須飯鍋上蒸透曬乾用磁餅收

存方免蛀壞○又一種東洋參出高麗新羅一帶
山島與關東接壤其參與遼參真相似氣亦同但
微薄耳皮黃紋粗中肉油紫屠舞夫鴻來子予曾見
之據云性溫平索價十換言產虆服之最效其力
不讓遼產也○五雜俎人參出遼東上黨者最佳
頭面手足皆具清河次之高麗新羅又次之今生
者不可得見入中國者皆繩縛蒸而夾之故上有
夾痕及麻線痕也新羅參雖大皆用數片合而成
之功力反不及小者擇參取透明如肉及近蘆有
橫紋者則不患其偽矣

昭參

金沙江志卽人參三七產昭通府肉厚而明潤頗勝粵產形如人參中油熟一種王子元官於滇曾以此遺外舅稼村先生子親見之狀較參紅潤大小亦不等味微苦甜皮上間有帶竹節紋者劉仲旭少府云昭通出一種名蘇家三七儼如人參明潤紅熟壯少者服之作脹惟六十以外人服則不腹脹其功夫補血亦不行血彼土人患虛弱者以之蒸雞服取大母雞用蘇三七煎湯將雞煮少時又將三七渣搗爛入雞腹用線縫好隔湯蒸至雞

爛去三七食雞可以醫勞弱諸虛百損之病據所
言卽昭參也○宦遊筆記三七生廣西南丹諸州
番峒中每莖上生七葉下生三根故名三七土人
入山採根暴乾色微黃形似白芨長而有節者其
味微甘而苦頗類人參人參補氣第一三七補血
第一味同而功亦等故人並稱曰人參三七爲藥
品中之最珍貴者此常中丞筆記所言人參三七
以形圓而味甘如人參者爲眞其長形者乃昭參
水三七之屬尙欠分晰也○識藥辨微云人參三
七外皮青黃內肉青黑色名銅皮鐵骨此種堅重

味甘中帶苦出右江土司最爲上品大如拳者治打傷有起死回生之功價與黃金等○沈學士云竹節三七卽昭參解醒第一有中酒者嚼少許立時卽解又近時人參三七中有名佛手山漆者形長儼如佛手上有指出廣西藥客販至其價在圓山漆之上此名荸薺山漆卽所稱銅皮鐵骨參三七是也王戌有客自打箭爐來帶有藏三七名佛手參儼如乾麥冬而堅實形小不大作三叉指形玲瓏如手故名王聖俞曾嘗其味淡而微辛涼云能治肺血勞損此亦白芨三七之屬也○浙產台溫山中出一種竹節三

七色白如僵蠶每條上有凹痕如臼云此種血症
良藥庚申予於晉齋處見瓊州山漆圓如芋皮光
色黃白肉黃如金云瓊人珍之名野山漆勝右江
所出者又一種出田州土司如佛手形名佛手三
七云此種係野生入藥更勝○百草鏡云人參三
七味微甘頗似人參入口生津切開內瀝青色外
皮細而緣一種廣西山峒來者形似白芨長者如
老乾地黃有節味甘如人參亦名人參三七又名
竹節三七此外又有旱三七名蘿蔔三七色白味
苦有小三七色黑出湖南寶慶府亦名紅三七有

羊腸三七卽水三七之類形如羊腸細曲又一種
出雲南昭通者能亂人參色味無異且油熟明透
但少蘆耳然回味太甜金御乘云近時市品三七
之外有水三七有白芷三七有竹節三七其形狀
功效皆未見其有考核者

味甘苦同人參去瘀損止吐衄補而不峻以末繆
諸血中血化爲水者佳大能消瘀療跌撲損傷積
血不行以酒煎服之如神

按人參三七出右江土司邊境形如荸薺尖圓不
等色青黃有皮味甘苦絕類人參故名彼土人市

入中國輒以顆之大小定價每顆重一兩者最貴
云百年之物價與遼參等餘則每顆以分計錢計
者價不過一二換而已昭參無皮形如手指絕無
圓小者間有短扁形者亦頗類白芨樣金沙江志
所載以爲卽人參三七恐未確故附存劉說以備
考

治吐血 種福堂方用雞蛋一個打開和人參三
七末一錢藕汁一小杯陳酒半小杯隔湯燉熟食
之不過二三枚自愈

七寶散 仇氏傳方刀傷收口用好龍骨象皮血

竭人參三七乳香沒藥降香末各等分爲末溫酒
下或繆上

陳氏回生集載軍門止血方人參三七白蠟乳香
降香血竭五倍牡蠣各等分不經火爲末敷之

菊花參

產雲南東川府巧家汎江邊葉似菊花

功用同人參力較遙

紅毛參

百草鏡漳泉估舶從紅毛帶來絕不類參形長而
粗長者有三四尺色紫黑粗者如拇指折之中有

白點痕有起花紋與建參相似

止瀉痢如神

煤參

出陝西西安等處形如參皮心俱青黑故名施柳
南太守云此參出陝西華山食之多吐人其性亦
劣

味微苦甘同人參功力則薄耳

建參

洪落梅附

藥性考福參出閩浙頗似人參而性味辛熱虛寒
病宜之歌云又有福參辛苦甘齊性溫益氣虛冷

人宜註福參多食則喉痛故知性熱○乙未子館
剴川故鄞屬也聞有市建參者往覓得之儼如臺
參中油熟一種大者惟不能純透亦有蘆無竹節
紋味亦苦甘以竹刀剖之心空不似遼參之堅實
劉蕡之自閩回言閩中近日大行亦清補兄患風
火牙疼煎湯漱口立愈則性又帶寒散或言其性
熱者猶未確也○金御乘云建人參性熱獨不宜
於產婦與遼參形色氣味真相似但遼參入口回
味生津此則回味稍濁故功用亦殊河南出光山
參嵩山參儼與遼產無別惟嚼之有渣不糯味亦

淡

法落梅 金沙江志產雲南東川府法要地○已酉
友人王鼎條患心腹痛有客從滇帶此物來呼爲
法落梅用根其形儼如上黨參色亦黃白味甘苦
服之疾愈據云彼中人皆名法落梅而不知諸書
何以作梅字耶蔡雲白言建參閩人呼法落梅
治心痛如神

土人參

各地皆產錢塘西湖南山尤多春二三月發苗如
蒿艾而葉細小本長二三寸作石綠色映日有光

土人俟夏月採其根以入藥俗名粉沙參紅黨卽將此參去皮淨煮極熟陰乾而成味淡無用準繩劫瘴消毒散用之呼爲百丈光

甘微寒須蒸之極透則寒去氣香味淡性善下降能伸肺經治節使清肅下行補氣生津治咳嗽喘逆痰湧火升久瘧淋瀝難產經閉鴻病由於肺熱反胃噎膈由於燥濇凡有升無降之症每見奇效以其根一直下行入土最深故也

脾虛下陷滑精夢遺俱禁用以其下行滑緩孕婦亦忌

白帶初起 百草鏡土人參切片三兩用陳紹酒
飯上蒸熟分作三服吃完卽愈

王安采藥方云土人參補陰虛對配茯苓熬膏治
楊梅結毒酒煎服

上黨參

防黨附

本經逢原云產山西太行山者名上黨人參雖無
甘溫峻補之功卻有甘平清肺之力不似沙參之
性寒專泄肺氣也○百草鏡云黨參一名黃參黃
潤者良出山西潞安太原等處有白色者總以淨
軟壯實味甜者佳嫩而小枝者名上黨參老而大

者名防黨參

味甘性平治肺虛能益肺氣

防風黨參 從新云古本草云參須上黨者佳今真
黨參久已難得肆中所市黨參種類甚多皆不堪
用惟防黨性味和平足貴根有獅子盤頭者真硬
紋者偽也白黨卽將此參煮曬以成原汁已出不
堪用 ○ 翁有良辨誤云黨參功用可代人參皮色
黃而橫紋有類乎防風故名防黨江南徽州等處
呼爲獅頭參因蘆頭大而圓凸也古名上黨人參
產於山西太行山潞安州等處爲勝陝西者次之

味甚甜美勝如棗肉近今有川黨蓋陝西毗連移植栽植皮白味淡類乎桔梗無獅頭較山西者迥別入藥亦殊劣不可用

味甘平補中益氣和脾胃除煩惱解渴中氣微虛用以調補甚爲平妥

南沙參

藥性考南沙參形粗似黨參而硬味苦性涼清胃瀉火解毒止嗽甯腳○從新云南沙參色稍黃形稍瘦小而短近有一種味帶辣者不可用○張璐本經逢原云沙參有南北二種北者質堅性寒南

者體虛力微

功同北沙參而力稍遜

按參類不一有竊參名者如苦參沙參是也有竊參形者如齊莞三七是也凡參皆隨地運爲升降故各地皆產參而性亦各異功用總不及遼參今擇可入藥爲綱目未及載者悉附識於此以廣知焉○張觀齋云珠兒參者其形獨蒜似之去皮煮熟色如紅熟人參因圓大而如珠故名其味苦而微帶辛不知何根子所造價每觔五錢治牙痛有驗大畧苦者性寒而辛者必散是火鬱發散之意

未必全在補功也至於紅黨參卽紅蘿蔔草所造白黨參未考此皆蘇地好奇者所製好奇之醫因而用之走方者所以惑鄉人稱太子參者乃參中之全枝而小者是參客巧取之名也洋參清氣同參味苦必寒疑產陰山補功雖不及人參較之珠兒紅白黨等遠矣土人參俗名觀音山貨形與人參無二亦有糙熟之分出處不一中有白絲心而味淡親見台溫處州及新昌嵊縣人有貨此參者價每兩兩許未考其性亦未用過如南沙參誤用者甚多南沙參產於浙地者鮮時如蘿蔔土人去

皮煮熟如熟山藥曬乾如天花粉而無粉性本名
粉沙參功專散毒消腫排膿非南沙參也其南沙
參形如桔梗而中空鬆味淡微甘桔梗帶辛而南
沙參不辛產於毫門者最佳俗名雄桔梗藥肆中
卽於桔梗包中揀出水潤打扁切片確類銀柴胡
片此則入肺而理嗽功如北沙參而兼理氣蓋中
空之義也台州亦出桔梗而條幹帶硬亦有雄桔
梗如南沙參但色不如毫產者白蓋參類本不一
近日價日昂貴而各種偽品雜出人亦日搜奇於
窮巖荒壑中覓相似草根以代混倘誤用之爲禍

非淺王繹堂云時下盛行一種福建長樂參廣西南陔參二物頗似儼與臺參油熬無別味亦苦中帶甜蒸湯亦極濃厚然皆性熱不似人參之平和滋益也卽臺參中近日人頗有入白糖及滷水製透取其重也凡參八分可製重二分作一錢以圖利店中有此參者每日必蒸焙否則潮潤難售故市參者須加意焉

於术

卽野术之產於潛者出縣治後鶴山者爲第一今難得價論八換其形有鶴頭鶴頭羽翼足俱全皮

細帶黃切開有硃砂點其次出北鄉皮色帶黑不
黃茅翼云產徽州者皆種术俗稱糞术乃糞力澆
灌大者肥而無鵝頸野生者名天生术形小有鵝
頸甚長內有硃砂點术上有鬚者尤佳以得土氣
厚也於术亦野生出於潛產縣治龍脈土上者其
內點真似硃砂猩紅如灑血鵝頸肉蘆乾之清香
產他處內或無點純白或有黃點總不及龍脈上
產者爲上品冬月採取形味方全一種江西术其
形甚小與野术相似雖有鵝頸而甚短其體堅實
其味苦劣不可用○萬曆杭州府志白术以產於

潛者佳稱於术清異錄潛山產善术以其盤結醜
怪有獸之形因號爲獅子术○西吳里語孝豐天
目山有仙丈峰產吳术名雞腿术入藥最佳○百
草鏡云白术一莖直上高不過尺其葉長尖傍有
針刺紋花如小薊冬採者名冬术汁歸本根滋潤
而不枯燥卻易油不能止瀉春採夏採者藏久雖
不易油卻枯燥不潤內亦不飽滿凡收术須陰乾
勿曬曬則爛野术形小蘆梗細硬皮細若蘆軟而
粗卽種术矣又有象术係合术中揀出如野术者
但切開有暈紋台术雖種而不用糞故不肥大服

之不脹倘野术難得此爲櫟安徽宣城歙縣亦有
野生术名狗頭术亦佳又一種係取野术種灌以
糞形雖大皮卻細緊出樟村較徽省種术稍好今
人論野术云黑土者真不知土色各處不同不可
執一而論又云小者真然老山貨年久亦有大者
又云有硃砂斑者真不知於术亦有無硃砂斑者
據土人言產縣後山脈及黃塘至遼東橋一帶西
流水四十里地之术方有硃砂點他處則無但野
术入口甜味雖重氣極清香自不同也總以白爲
佳以潤爲妙○葉天士本草云浸刮飯鍋上蒸曬

如棗黑黃土炒爲中宮和氣補脾之藥○本經逢原云雲术肥大氣壅台术條細力薄甯國狗頭术皮赤稍大然皆栽灌而成故其氣濁不若於潛野生者氣清無壅滯之患八風痺痰濕利水破血藥俱生用然非於潛產者不可生用也○張觀齋云今有一種野术深山處必有形如於术切開有硃砂斑香而不甜細考其味親見其苗乃天生之蒼术也因久無人採故大而宛如於术大凡术以火焙乾者味必苦生曠者味必甜台术以及各處種术皆於术所種而變者功雖不如於术服亦有驗

今於术絕少市中皆以仙居所產野术充於术功亦相等○辛亥五月有客自青田縣來帶有天生术大小如一約重兩許俱生者未經日曬乾焙若乾之可三錢許其术形儼如仙鶴翅足皆具亦有長頸頸皆左顧一一相似無作磊塊形者詢之云此术不生於土所生之地係青田邊境有一山山有石壁壁上每年生此术二三十觔不能多有○吾杭西北山近畱下小和山一帶地方及南高峯翁家山等處皆產野术氣味香甜生啖一二枚終日不餓生津溢齒解渴醒脾功力最捷切開無硃

砂點膚理膩細而白如雪色名曰玉术又呼雪术
亦不易得入藥功效與於术等較他產野术尤力
倍也

甘補脾溫和中補氣生血無汗能發有汗能止開
胃補脾則能進飲食去勢倦止肌熱化癥癥和中
能已嘔吐定痛安胎燥濕利小便生津液止泄瀉
化胃經痰水理心下急滿利腰臍血結去周身濕
痺凡下焦陰氣不脫上焦陽氣驟脫者無力用參
重用野术大能起死回生用糯米泔浸陳壁土炒
或蜜水炒人乳拌用炒黃不宜焦焦則無力矣熬

膏更良禁忌同白术

代參膏 楊春涯驗方於术十觔白米泔水浸三晝夜洗淨浮皮蒸曬十次有脂沾手爲度切片熬膏一火收成滴紙不化用白茯苓十觔春末水飛去浮只取沉者蒸曬十次沾手如膠與术膏攪勻每服兩許米湯送下

治虛弱枯瘦食而不化用於术酒浸九蒸九曬一觔菟絲子酒煮吐絲曬乾一觔共爲末蜜丸梧子大每服二三錢

四製仙术散 治盜汗不止此藥如神於术四兩

分四製一兩黃芪煎汁炒一兩牡蠣粉炒一兩麩
皮湯炒一兩石斛湯炒只取术爲末服三錢粟米
湯下

各色痼疾 傳信方於术一兩老薑一兩當歸五
錢水二碗煎好露一宿服自愈

保胎丸 良方集要茯苓二兩條芩一兩於术士
炒一兩紅花一兩沒藥三錢製香附一兩元胡索
醋炒一兩益母草去根一兩共研末蜜丸桐子大
早晚白滾水服七粒不宜增減戒惱怒勞傷生冷
發氣等物凡遇腹痛腰酸作脹卽宜服之成孕三

月卽服起直至足月不但保胎卽臨產亦可保易

生無恙

方內紅花元胡索二味皆是行血滑胎之品分兩太重每味只可二錢方合本方君

臣用者

詳之

三日瘡 古今良方九製於术一觔廣皮八兩熬膏用飴糖四兩收

又方 專治四日爾頭或一二年至三四年不愈

者或愈而復發連綿不已者用於术一兩老薑一

兩水煎發日五更溫服卽愈重者二服永不發矣

北雲术

邊塞志產遼東口外五國城等處此术初生土中

並無枝葉生於暗地者多城北最盛天氣晴和則掘地求之可得色如枯楊柳大小如筋蔓延數十步屈曲而生此地病人無藥物凡有疾者煎此湯服之自愈又可占病人之吉凶若煎沸數次藥浮者病卽愈半浮半沉者病久不愈土人以此驗之

治風寒傷食一切病

南連

仙姑連

天姥連

一名土連浙溫台金華山中俱有之出處州者名處連以形大毛輕者好性較川連尤寒北人市去

爲馬藥○百草鏡土黃連二月發苗根葉與羊蹄
大黃無異但短小耳三月抽莖高有尺許花細成
穗結實初青後紅子藏稜中夏至後枯出浙江者
名慈連安徽甯國府宣城出者粗肥名宣黃連
性寒而不滯入膏丹用最良

吉氏家傳血痢用宣連爲末以雞子搜作餅炭火
煥令通赤蓋定勿泄氣候冷研細空心米飲下五
分大人一錢以意加減按宣連卽今江浙東西
一路所產黃連皆當日宣州路也

仙姑連

出台州仙居縣邑人相傳吳魏時蔡經居此故以
名邑王方平曾偕麻姑降其宅今遺址猶存其地
產黃連粗如雞距皆作連珠形皮色青黃光潔無
毛味大苦寒折之有烟色如赤金者佳療火症更
捷於川產者馬藥非此不可

天姥連

出天台皮色鼠褐略有毛刺味苦入口久含清
甘氣

大瀉心火性寒而帶散故治目症尤效

水黃連

川中一種黃連生於澤旁週身有黃毛如狗脊毛
狀名水黃連頗細小醫家不知用市人以之偽充
真川連出售惟祝氏効方用之○百草鏡水黃連
打箭爐出者形細長少硬刺較重於他連以皮肉
帶青色者爲佳出山西天者色黑有毛者佳無毛
光黃者次之

治鼻瘡用百部三錢切片曬乾炒取淨末二錢地
骨淨炒二錢五棓子炒黃柏炒甘草炒各二錢水
黃連切片炒一錢共爲末如鼻瘡爛通孔者以此
調香油搽立結痂愈

馬尾連

出雲南省藥肆皆有之乾者形如絲上有小根頭
土人盤曲之以市

性寒而不峻味苦而稍減不似川連之厚性能去
皮裏膜外及筋絡之邪熱小兒傷風及痘科用

浙烏頭

卽僧鞋菊

此乃烏頭之產於浙地錢塘笕橋人種之市爲風
癩藥近日人家園圃亦有之名鸚鵡菊又曰僧鞋
菊追風活血取根入藥酒良

霍石斛

五色石斛附

出江南霍山形較釵斛細小色黃而形曲不直有
成球者彼土人以代茶茗云極解暑醒脾止渴利
水益人氣力或取熬膏餉客初未有行之者近年
江南北盛行之有不給市賣率以風蘭根偽充但
風蘭形直不縮色青黯嚼之不黏齒味微辛霍石
斛嚼之微有漿黏齒味甘微鹹形縮者真○百草
鏡石斛近時有一種形短祇寸許細如燈心色青
黃咀之味甘微有滑涎係出大安州及潁州府霍
山縣名霍山石斛最佳咀之無涎者係生木上不
可用其功長於清胃熱惟胃腎有虛熱者宜之虛

而無火者忌用○年希堯集驗良方長生丹用甜石斛卽霍石斛也范瑤初云霍山屬六安州其地所產石斛名米心石斛以其形如累米多節類竹鞭乾之成團他產者不能米心亦不成團也

甘平味鹹 陳廷慶云本草多言石斛甘淡入脾鹹平入胃今市中金釵及諸斛俱苦而不甘性亦寒且形不似金釵當以霍斛爲眞金釵斛○清胃除虛熱生津已勞損以之代茶開胃健脾功同參耆○定驚療風能鎮涎痰○解暑甘芳降氣

五色石斛 雲南志產祿勸州普渡河瀨江石壁間

色紺紅者佳

療胃熱益虛羸

銀柴胡

經疏云俗用柴胡有二種一種色白黃而大者名銀柴胡專用治勞熱骨蒸色微黑而細者用以解表發散本經並無二種之說功用亦無分別但云銀州者爲最則知其優於發散而非治虛熱之藥明矣本草滙柴胡產銀夏者色微白而軟爲銀柴胡用以治勞弱骨蒸以黃桔牛膝浸一宿曬乾治勞熱試驗○本經逢原云銀柴胡銀州者貞今延

安府五原城所產者長尺餘肥白而軟北地產者
如前胡而軟今人謂之北柴胡勿令犯火犯火則
不効○百草鏡云出陝西甯夏鎮二月採葉名芸
蒿長尺餘微白力弱於柴胡○藥辨云銀柴胡出
甯夏鎮形如黃芪內有甘草串不可混用○翁有
良云銀柴胡產銀州者佳有二種但辨形如鼠尾
與前胡相等查前胡與柴胡相類皆以西北出產
者爲勝形既相同當以湖廣古城柴胡爲準今銀
柴胡粗細不等大如拇指長數尺形不類鼠尾又
不似前胡較本草不對治病難分兩用究非的確

用者詳之○金御乘云銀州柴胡軟而白北產亦有白色者今人以充白頭翁此種亦可謂銀柴胡蓋銀指色言不指地言猶金銀花白色者曰銀花是也銀柴胡原有西產北產之分不必定以銀夏者爲銀柴胡也然入藥以西產者勝○按綱目註銀柴胡以銀夏出者爲勝不知今人所用柴胡有北柴湖南柴胡之分北產如前胡而軟南產强硬不堪用又銀柴胡雖發表不似柴胡之峻烈綱目俱混而未析

甘微寒無毒行足陽明少陰其性與石斛不甚相

遠不但清熱兼能涼血和劑局方治上下諸血龍
腦雞蘇丸中用之凡入虛勞方中惟銀州者爲宜
北柴胡升動虛陽發熱喘嗽愈無甯宇可不辨而
混用乎按柴胡條下本經推陳致新明日益精皆
指銀夏者而言非北柴胡所能也

周一士云凡熱在骨髓者非銀柴胡莫療

治虛勞肌熱骨蒸勞瘧熱從髓出小兒五疳羸熱

撫芎

產江西撫州中心有孔者是

辛溫無毒 逢原云性最升散專於開鬱寬胸通

行經絡鬱在中焦則胸膈痞滿作痛須撫芎開提其氣以升之氣升則鬱自降故撫芎總解諸鬱直達三焦爲通陰陽氣血之使然久服耗氣令人暴亡矣○按芎藶有數種蜀產曰川芎秦產曰西芎江西爲撫芎綱目取川芎列名而西芎撫芎僅於註中一見亦不分其功用蓋芎藶以蜀產爲上味辛而甘他產氣味辛烈遠不逮矣殊不知西芎與川芎性不甚遠俱爲血中理氣之藥第西產不及川產者力厚而功大至撫芎則性專於開鬱上升迥然不同故石頑於川芎下另立撫芎一條以明

不可混今從之

芎歸飲 不藥良方治失血湧吐因飽食用力或
因持重努傷脈絡用當歸二兩或三兩酒浸洗撫
芎一兩微炒水三碗酒一碗半煎至八分作二次
服之取其引血歸經並治跌撲墮打而傷脈絡令
人大吐者二症中如有瘀血或加大黃下之或加
桃仁紅花破之或加鬱金黃酒行之審症酌加其
效更速

曹濟方一切熱癰時毒腫痛撫芎蝦研入輕粉麻
油調塗

土黎蘆

汪連仕云卽千葉水仙花黃白者入藥紅者不可服取根罨毒曬燥研末合通關散搐鼻令人吐痰一切風症多可用之

綠升麻

從新云乃升麻之別一種繆仲醗廣筆記用治下痢每每有驗

性最竅捷治痢疾下傷

按升麻色綠者佳非另一種也

金鐘薄荷

汪連仕草藥方云卽細葉薄荷山產者根堅硬以
米醋磨敷蜂刺蟲叮蜈蚣咬

葉 治跌打損傷腹蟲牙痛煎湯咽之

王安采藥方金鐘荷葉卽薄荷 止吐血黃疸跌
打諸般風氣合濟陰丸

白毛夏枯草

產丹陽縣者佳葉梗同夏枯草惟葉上有白毛今
杭城西湖鳳凰山甚多

性寒味苦專清肝火

山牛膝

一名蘇木紅今人呼荔支紅又名透血紅產富陽
竹園內善能理瘡并刀箭入肉

活血化瘀寬筋理跌打損傷治破傷風七十二般
惡疾非此不除功勝川產汪氏方

土連翹

巴山虎附

乃鬧楊花子也鬧楊花卽黃杜鵑一名石棠花牛
食之卽瘋頭富陽北泥山白洋溪一帶山中甚多
彼土人呼爲石棠花卽黃色映山紅也○百草鏡
云殼似連翹子類芝麻故一名山芝麻入藥每服
三分不可多服方術家麻藥中有之其根名巴山

虎入藥去骨用

汪連仕草藥方土連翹卽鬧楊花子今呼爲南天竺草

苦溫治風寒濕痺癰瘍腫脹撲損疼痛毒疔瘡

用之神效

汪連仕草藥方治跌打損傷能活血
疎風理七十二般風氣爲外科聖藥

透骨丹

藥鑑治跌撲損傷深入骨髓或隱隱疼

痛或天陰則痛或年遠四肢無力此藥主之真神

方也鬧楊花子一兩火酒浸炒三次童便浸二次

焙乾乳香沒藥不去油血竭各三錢爲末研勻再

加麝香一分同研磁瓶收貯封固每服三分壯者

五六分不必吃夜飯須睡好方服酒可盡量下服

後避風有微汗出爲要忌房事酸寒茶醋等物弱

者間五日一服壯者間三日一服○按吉雲旅抄
有治無名腫毒疔瘡發背一醉消奇方用山芝麻
三分研極細末以好酒煎數沸帶渣服下蓋被出
汗不可見風一服全消但不可用燒酒則又與藥
鑑製法異並附於此善用者擇之

將軍復戰丹 張雲野瑣記治跌打損傷以山芝
麻二十兩童便浸四次燒酒浸三次畧炒乳香沒
藥各炙去油三兩血竭煨二兩爲極細末火酒送
下四分隨食白煮豬肉壓之如持齋者食白腐乾
服藥後切記避風

七釐散 吳興楊氏便易良方治金刃傷止痛如神用龍骨硼砂血竭酒洗兒茶天芝麻卽土連翹各五分爲細末每服七釐

十全丸 藥竹堂驗方治風痺跌撲癱疽初起一服卽能消散惟虛弱人須先補而後用此攻之麝香三錢穿山甲土炒脆廣木香生研血竭另研雄黃水飛山芝麻酒炒番木鼈黃土炒焦黃爲度不可太枯篩取淨末自然銅火煅醋淬九次研細水飛僵蠶炒去絲去頭足以上各一兩川蜈蚣去足尾二十一條酒炙爲末蜜丸桐子大以硃砂爲衣

金箔裹之蠟丸封固每用一丸至重者再進一丸
用羌活紫蘇酒煎化服取汗避風否則發戰傷人
一方去木鱉子加風茄花五錢山芝麻亦用五錢
較穩

馬前散 救生苦海治癱疽初起跌撲內傷風痺
疼痛其效如神番木鱉忌見鐵器入砂鍋內黃土
拌炒焦黃爲度石臼中搗磨用細篩篩去皮毛揀
淨末山芝麻去殼酒炒各五錢乳香末箬葉烘出
汗五錢穿山甲黃土炒脆一兩每眼一錢酒下不
可多服服後避風否則令人發戰慄不止如人虛

弱每服五分

五虎丹 治風痺跌撲腫毒初起草烏去皮薑汁

拌曬隔紙炒山芝麻燒酒拌曬炒雄黃水飛血竭
箬葉上烘燥穿山甲砂炒各一兩爲末丸如芥子

大酒下二三分不可多此方見草寶真刼劑也

巴山虎

卽鬧楊花根也
妙方名巴山虎

衆追風定痛

神妙草頭痧藥

行篋檢秘鵝不食草井子一兩

南星半夏黎蘆漏蘆牙皂鬧楊花子鬧楊花根各

一錢俱曬燥磨極細末此藥專治中暑中寒中風

不語牙關緊閉急慢驚風小兒筋抽將藥吸入鼻

內噴嚏來立時甦醒亦可用陰陽水調服二三分
立愈

薰痔漏仙方不可刀針掛線及服藥丸散用鬧楊
花根俗名老虎花像杜鵑色黃其根如鐵將此根
搗碎煎湯放罐內置桶中蓋上挖一孔對痔坐定
燻之湯冷復熱之再燻其管觸藥氣自漸漸潰爛
不堪燻半月自愈重者一月收功永不再發切不
可洗

治兩腮紅腫梁氏集驗百合一個山芝麻根去皮
貝母元明粉各一錢銀硃七分加白麵調敷

本草綱目卷三
土茜草

一名地蘇木過山龍風車草此南方所產蒨草也葉四五瓣成一叢攢莖節而生方梗柔蔓皮糙澀棘人指獨莖直上一二尺乃有分歧處葉如箭鏃風吹能環轉如車輪故名又名八仙草以其葉相對攢簇枝葉間生也其根黃赤色不可染又名活血丹○百草鏡云此草秋時結實小如梧桐子實後枯立夏後發苗

百草鏡性平入肝脾心經治打傷跌壓活血性善行血無瘀者禁用○葛祖方治癰氣痛通經下胎

黃疸鬼箭打癰瘡蛇傷○藥鑑云功專活血治跌撲癰毒癥瘕經閉便血崩中帶下痔漏風痺鬼箭風臌脹黃疸蛇傷

疔瘡朱羅峯方過山龍仙橘草蒼耳草希荳草紫花地丁野苧麻根六味等分酒煎服取汗須多服蟾酥丸汗出鹹者可治若味淡不可治

又方地蘇木陰乾爲末重者八錢輕者五錢好酒煎服如放黃者沖酒服渣罨疔上

野苧麻

採藥志天青地白草又名川綿蕊卽野苧麻也

一名銀苧又名天名精生山土河塹旁立春後生
苗長一二尺葉圓而尖面青背白有麻紋結子細
碎根擣之有滑涎入藥用根取鬆土者良肥白無
筋按此與地菘別

性涼治諸毒活血止血功能發散止渴安胎塗小
兒丹毒通蠱脹崩淋哮喘白濁滑精牙痛喉閉骨
哽疝氣火丹癧毒胡蜂毒蛇咬發背疔瘡跌撲損
傷○救生苦海午日取野苧葉陰乾曬燥搓熟取
白絨收藏夏月遇有金刃傷者敷之卽止血且不
作膿○百草鏡跌撲野苧根一兩搗碎好酒煎服

盡量飲醉。漆瘡紅腫合紫霞膏又爲女科聖藥
痘毒以野苧麻去皮搗敷。癰疽發背對口一切
無名腫毒野苧麻搗汁用無灰酒沖下渣敷患處
露頭蓋被出汗卽出膿水全愈

跌打閃挫方 教師白宇亮傳大鯽魚一尾獨核
肥皂一個胡椒七粒黃梔子九個老薑一片葱頭
三個野苧麻根一段乾麵一撮香糟一團紹酒隨
數用同前藥合搗如泥炒熟敷患處立愈外用布
包紮緊次日青出卽愈。救生苦海治神鬼箭用
野苧麻川南星同搗敷

徐若甯云蛇虺咬看傷處有竅是雄蛇無竅是雌蛇以針挑破傷處成竅然後取野苧麻嫩頭搗汁和酒服之三盞絞剩渣敷傷口能令毒從竅中出傷立愈將渣棄水中永不復發

鷄鴨腳艾

百草鏡葉細多岐間有澗者雜之薑蕤如鷄鴨腳然故名搓之作艾香

治腳氣疝氣

千里光

一名九里明一名黃花草綱目附見千里及下接

千里光爲外科聖藥俗諺云有人識得千里光全家一世不生瘡納目不載入外科用。百草鏡云此草生山土立夏後生苗一莖直上高數尺葉類菊不對生。圖經云千里光生淺山及路旁葉似菊而長背有毛枝幹圓而青春生苗秋有黃花不結實采莖葉入眼藥名黃花演

治目不清去紅絲白障迎風流淚百草鏡○明目去星障煎湯浴瘻瘍合膏點赤眼貼楊梅瘡狗咬以千里膏摻粉霜貼之治蛇傷治四塊鵝掌風王三才醫便用千里光草一握蒼耳草二中

握朝東牆頭草一小握共入瓶內水煎百沸以手少擦麝香向瓶燶之仍用絹帛繫臂上勿令走風三次卽愈千里光卽金釵草是也

治時疫赤鼻聾耳火眼諸瘡癤腫毒破爛及鵝掌風合千里光膏點赤眼貼楊梅瘡加狗油熬粉霜尤妙王安采藥方

小青草

五月生苗葉短小多莖不甚高開花成簇紅色兩瓣與大青同但細小耳一名蜻蜓草一名蒼蠅翅與綱目小青條集解下引圖經生福州三月生花

亦不載其形狀未免失考且主治亦別○圃事須知小青一名淡竹花此則另是一種

味苦大寒理小腸火治兒疳積赤目腫痛療傷寒熱症時行咽痛治疳積煮牛肉田雞雞肝食之疳瞎煮豬肝食○黃疸勞瘧發熱○翳障初起○百草鏡小青草五錢煮豆腐食

雀目 百草鏡一名雞盲白晝見物將暮卽昏雞

肝或羊肝取一具不落水小青草五錢安碗內加酒漿蒸熟去草吃肝三服卽愈加明雄黃五分尤

妙

澤半支

百草鏡葉如鼠牙半支生山澗處葉皆對節夏開

黃花如瓦松

治蛇咬疔腫

狐尾草

汪連仕采藥書狐尾草花如狐尾九節而生長水

澤旁名狐媚花

主治吐血金瘡

取根敷

一切腫毒

根罨

洗瘡

用葉

金錢草

一名遍地香佛耳草俗訛白耳草乳香藤九里香

半池連千年冷遍地金錢其葉對生圓如錢錢兒
草葉形圓二瓣對生象鏹斂生郊野濕地十月二
月發苗蔓生滿地開淡紫花間一二寸則生二節
節布地生根葉四圍有小缺痕繩面以葉大者力
勝乾之清香者眞三月採勿見火綱目有積雪草
卽此但所引諸書主治亦小異故仍爲補之至綱
目所載言其治女子少腹痛有殊效其方已載綱
目此不贅述

味微甘性微寒祛風治濕熱 百草鏡跌打損傷
瘡疾產後驚風肚癰便毒痔漏擦鵝掌風汁漱牙

又正統本草卷之三
疼葛祖方去風散毒煎湯洗一切瘡疥神效採藥
志云發散東風風邪治腦漏白濁熱淋玉莖腫痛
搗汁沖生酒吃神效

按蔣儀藥鏡云佛耳草下瘀定喘能去肺脹止哮
竊嗽大救金寒以之列入熟部豈以其氣辛耶
白虎丹 祝氏效方鮮野甜菜卽車前草洗淨加
遍地香搗爛用白酒和汁絞出鵝毛蘸搽患處卽
消

疥瘡 救生苦海鉢兒草加鹽少許搓熟頻擦全
化然後洗浴三次必愈若用煎洗反不見效

疔瘡走黃毒歸心。○慈航活人書銅錢草卽遍地
香採葉搗爛童便煎服服後再飲好菜油二三碗
令吐如吐卽不必服矣再加生豬腦一個全白粽
子搗勻敷

張介賓本草正佛耳草味微酸性溫大溫肺氣止
寒嗽散痰氣散風寒寒熱亦止泄瀉鋪艾捲作筒
用熏久嗽尤妙

望江青

一名還精草玉星草銀腳鶯鶯血見愁穀雨後發
苗生澤旁湖岸方莖中空葉狹長而尖有鋸齒對

節小滿後抽莖開花成穗細紫層層而上寒露時
柏根多鬚節間方而白極長亦空明根尤妙

王聖俞云銀腳鷺鷺葉似胡麻而小直莖可尺許
長其葉對生根絕類水芹味甘而多津液採而以
蜜拌蒸食治肺虛失音及久服最益人西湖諸山
皆有之據此則似另一種蓋望江青根白而不長
若長者乃銀腳鷺鷺也並存以俟考

李氏草秘望江青俗呼天芝麻以其葉似芝麻葉
也方梗對節生葉至春節間開紅紫花生水溝澤
邊形微似諸闡草

涼苦百草鏡性寒而味微苦入肺經吐血服之生
精還力除濕熱去星障療肺癰勞力傷脫力黃同
金器煎服愈驚風

治打傷撲傷最活血搗汁冲酒服渣罨傷處一人
閃足痛不能舉無苗尋其根搗汁入煎劑三服而
愈同牛膝芍藥當歸獨活玉叉草活血丹七葉草
五爪龍放棒行金雀腦覆絲藤撒草等和勻搗汁
加酒服之損傷垂死但得入咽可生並治諸爛痛
瘡癬吐血亦效

目中去星翳障 百草鏡望江青一兩羊肝一具

同豆腐羹食

吐血 白蜜二兩隔湯頓熟望江青一兩煎汁冲蜜服不論遠年新起一切血症二服除根嘉慶三年予僕孫成患血症甚劇得此方而愈但服此藥後每服須吃桂圓五粒二服吃十粒方無後患此藥服後人如醉惺惺然欲睡一週時自愈再得燕窩粥培元更妙

乳癰乳核 秋泉家秘祖傳天下第一奇方專治乳癰乳核腫硬大者服之卽內消用九龍川卽龍見怕一兩細葉冬青卽山黃楊五錢龍爪紫金鞭

卽馬鞭草又名龍爪草一兩金剪刀三錢九節金絲草卽望江青五錢遍地金龍草卽地五爪三錢用無灰酒二碗加香圓葉或橘葉十餘片煎鍾半餓時隨量二三次服之渣再煎服

絕瘧 望江青乾者五錢煎酒服

予表戚張石港生平常服望江青每日用乾者三錢北棗六枚同煎食如是三年身輕腳健終年無疾其功不下參也

無骨苧

接骨草

麻衣接骨

紫接骨附

卽玉接骨一名血見愁玉錢草麒麟草玉連環葉

小圓根如水芹生溼陰處立夏時發苗逢節則粗葉尖長根蔓延色白多粗節類竹根搗之汁粘高者尺許鬆土種之極易繁衍入藥用根百草鏡云玉盤龍一名無骨苧麻葉類苧麻而薄小背不白莖如筋色明透至九月莖白明如水晶上有細紅點子十月萎採宜九月一名玉梗半枝蓮搗之有白漿稠滑綱目葫蘆條釋名云卽接骨草蘇恭云葉似芹寇宗奭云花白子青十月子乃紅熟有一二百子時珍云每枝五葉按羣芳譜則花白而葉不類其根乃似水芹今人搗汁以續筋骨損折頗

驗名玉接骨當是此種然綱目無一語治折傷且所引形狀率多含混故特詳斷補之

性涼味甘淡入肺經血分治吐血腸紅下血跌打損傷采藥志云接骨草又名玉梗金不換性溫能止血生肌行肺經之惡血引血歸經理氣開胃大有功效

接骨草 苗如竹節出廣西粵語此草叢生高二三尺葉大如柳而厚莖有節色綠而圓花白午開自三月至九月不絕羣芳譜四季花一名接骨草葉細花小色白自三月開至九月午開子落枝葉

搗汁可治跌打損傷九月內剖根分種肇慶志接骨草出封川陽江一名四季花生園林中莖綠而圓葉長如指而尖花白跌傷骨節搗爛敷之可以接骨而本草不載李氏草秘義耳草又名接骨草生墻崖上葉如羊耳專治接骨性平治折傷續斷骨癒卽愈

麻衣接骨 生背陰山腳下或澗旁穀雨後發苗葉類苧麻背不白對節生節下則粗如鵝膝作紫色嫩按接骨草數種俱產深山澗隰旁近地罕得人家間有種之者然麻衣接骨每不易得玉節骨性涼味甘而補能和中調血生髓益津其功不僅

專治折損麻衣接骨性溫可行血惟專治折損故人多不傳其種辛亥予館臨安遊西徑山寶珠寺見山門外遍隙地皆麻衣接骨形狀礪如土牛膝而粗處作紫黯色甚脆折之從粗節處斷視之紫透中心誠爲佳草不易得而山僧土人悉皆莫識故得滋育盈畦也

治跌打損傷

紫接骨 生山土與麻衣接骨相似而葉莖俱紫
治跌撲勞傷損瘀

汪連仕云金寶相一名金鉢盂奄金瘡之聖藥又

能散風透膿一夜卽透其葉如蝴蝶花根如商陸
卽皴皮葱今呼麻葉接骨敏按汪所論當又是一
種亦非荔支草而又不是似牛膝之一種接骨也

鳳眼草花上細粉附

此草苗如薄荷葉微圓長五六寸穀雨後生苗立
夏後枝桺間復生二小葉節節皆有至秋後二小
葉中心白色儼如鳳眼故名八九月眼中開花其
花如髮長一二寸紫黃色亦可入藥○百草鏡鳳
眼草芒種後其枝桺間二小葉中心各起蓋一粒
如人兩眼細碎如石胡妻子狀至小暑後色轉紅

黃漸抽長如鬚此草自苗至老葉皆有淡紅暈
敏按經驗廣集治小便不通有皂角湯煎法方中
用鳳眼草乃臭椿葉別名與此名同物異又荔支
草亦名鳳眼草與此亦異

治一切風癆活血去風酒煎服立效

室女乾血勞 用鳳眼草連根葉鮮者一兩加紅
花三錢酒煎服通經自愈

四日兩頭瘡 用鳳眼草煮紅棗飲汁自愈俱傳
信方

婦女經閉不通發熱勞症 鳳眼草爲末一兩紅
花炒二錢水三鍾煎一鍾入黑糖五錢空心服三

五劑見血方止

醫學指南

遺精白濁 鳳眼草炒乾研末五錢沖熟黃酒服

醫學指南

花上細粉 入麝藥治蟲定癢

風膏藥

桂海草木志葉如冬青 粵志肇慶七星岩產風
藥叢生石罅其葉圓厚和酒嚼之治風疾一曰風
草一曰風菜諺云風病須風藥卽此 按福甯府
志風藤草一名山膏藥治風愈瘡或卽此歟

治太陽頭疼目昏眩

竹葉細辛

卽獐耳草香勝細辛

治脫力虛黃汪氏方

離情草

出雲南夷中多有鬻之者凡人爲情慾錮閉往往致死得此草一莖煎服之入口卽豁如夢覺斷緣絕愛亦不自知所以然也按段成式雜俎載左行草使人無情范陽以之入貢或卽此類歟又有合情草與之相反可知造物之生物必有對待如此也

己相思絕情愛如神

和合草

此卽合情草也柳崖外編永昌府瀾滄江外有和合草根潔白結男女交媾狀土人見之用稻米周遭圍之掘方可得否則遁去有夫婦不諧者服之卽歡好然載諸江船輒沉溺不得渡智者用長線繫置岸側持線登舟渡畢然後引過故滇省近邊一帶時時有之間服之者曰男視女雖嫫母西子王嫱不若也女視男雖醜亦潘安雖老亦健兒也治夫婦相憎疾煎酒服

鹽蓬
蓬

藥性考二種皆產北直鹹地土人割之燒灰淋湯
煎熬得鹽其葉似萬圓長至秋時莖葉俱紅燒灰
煎鹽勝海水煮者

味鹹性涼清熱消積

知風草

藥性考生雷瓊蔓生無毒土人春日視其苗有一
節則一次有風入藥以無節者浸酒用治一切風
病入骨能拔之外出

鳳頭蓮

出臺灣內山形如黃連色紫多細鬚茸茸然分岐
如鳳頭故名

性平治咽喉一切諸症

梨鬆果

如肥皂出臺灣

治疗瘡磨塗

蒲包草

滔人書又名鬼蠟燭新語云水蠟燭草本生野塘
間秋杪結實宛與蠟燭相似有詠者云風搖無弄
影煤臭不燃烟以其開花結實纖似蠟燭故名蠟

葷湯中頗多土人採其實以治金刃傷止血用
治療癰 蒲包草連根採來洗去泥切寸段砂鍋
煎湯代茶飲不論男女皆愈但婦人服此愈後終
不受孕須服北京真益母丸四五兩可解之

汪連仕采藥書蒲萼卽蒲草南人呼莎草北人呼
板枝花結實爲鬼蠟燭其粉卽蒲黃

鬼扇草

采藥錄鬼扇草生石壁上葉面青有直紋如白果
葉狀枝條生如扇骨人若打死在地搗此草汁灌
入口卽甦醒

鮎魚鬚

采藥錄鮎魚鬚草梗葉青色面起直紋葉葉有鬚
二條其根如竹鞭狀

治療瘡一切諸瘡

汪連仕云鮎魚鬚沿藤如豆葉二丫內生二鬚根
白而粗專治外科一切疔瘡腫毒罨之立消

紫背稀奇

采藥錄紫背生陰山著地布苗葉有兩大兩小面
灰色有直紋背微紫若起心有藤一二尺長葉尖

對生

治痘毒用活草一觔作二服酒煎下已成速愈未
成立消

雀麥

汪氏采藥書卽雀角花此花令人觸忿花象雀腳
獵人采熬藥箭呼爲破關草人以其能爛痔漏呼
爲破管草

性熱氣烈傷人肌膚立能潰腫須米醋炒用腐腸
之品不入湯劑惟外治點痔漏用之

汪氏方

לענין קדשו של ר' יוסי

וילך